



# Quartier D'ANTÉ



Auflage 8000 Exemplare

FEBRUAR 1953

ORGAN DER INTERESSENGEMEINSCHAFT ST. JOHANN BASEL

NUMMER 32

Redaktionskommission: H. Hunziker, St. Johannvorstadt 60, Telephon 45266

P. Regenäf, St. Johannvorstadt 44, Telephon 47640

Verantwortlicher Redaktor: Dr. jur. Fr. Weber, Ryffstrasse 7, Tel. 29073

Redaktion: Postfach 60, Basel 13

Administration und Inserate: H. Schwob, Mülhauserstrasse 133

Telephon 45035

*(Abonnement)*

## Unseri – die ainzigi Fasnacht

Ob Ain in Yänkeduudlie Döller sammlet,  
 Ob Ain uff den Antille ummerammlet,  
 Ob Ain in Argentinie Gfrierflaisch packt,  
 Ob Ain z' Bolivie ummestrolcht halb nacht,  
 Ob Ain z' Australie Känguruuli ryttet,  
 Ob Ain dert Schoof schärt oder Schybe kittet,  
 Ob Ain in «AFRIQUE» Diamante grabbt,  
 Ob Ain am Nordpol Tran uus Funsle labbt –  
 Wenn er e Basler isch, isch's hundewurscht:  
 Er kriegt noh syner Basler Fasnacht Durscht!

Ob Aine syg e Diggen oder e Lange,  
 Ob Ain e Faß syg oder e Fahnestange,  
 Ob Aine Hoor haig oder au e Glatze,  
 Ob Ain e Gluft trait, wonem d'Hose blatze,  
 Ob Ain e Frau haig oder nummen e Mysli,  
 Ob Ain uff Bänkli pfuust, ob immene Hysli,  
 Ob Ain e Hirsch syg ~~oder~~ en ibli Nummere,  
 Ob Ain e Millionär syg in Belzbummere –  
 E Basler kriegt noh syner Fasnacht Durscht  
 Und – isch derby! (... und's Ander isch em wurscht!)

Ob Aine Gmies verkauft, ob alti Hose,  
 Ob Ain mit Roßmischt handlet, ob mit Rose,  
 Ob Ain als Styrbeamte d'Kundschaft degglet,  
 Ob Ain als Schlinggi gar gärn «arnoldbegglet»,  
 Ob Ain als Journalischt e Kircheliecht isch,  
 Ob Aine hinder den Ohre no ganz fiecht isch,  
 Ob Ain e Schugger oder ~~oder?~~ e Knot isch,  
 Ob Ain politisch schwarz, ob giggelrot isch –  
 E Basler kriegt noh syner Fasnacht Durscht  
 Und – isch derby! (... und's Ander isch em wurscht!)

Ob Aini sittsam isch, ob ender luusig,  
 Ob Aini härig jung, ob alt und gruuusig,  
 Ob Aini Miller haiß, ob Meria-Kedli,  
 Ob Aini's Dram in bar zahlt, ob mit Lechli,  
 Ob Aini schetzt's ~~Weingartner~~ <sup>W</sup>emänts-Konzärt,  
 Ob Aini meh e Tschässbändfurz begärt,  
 Ob Aini d'Fingerneegel molt im Byro,  
 Ob Aini numme Zeedeli schribt fir's Giro ...  
 E Baslere kriegt halt noh der Fasnacht Durscht  
 Und – isch derby! (... und's Ander isch ere wurscht!)

Ob Aini Tscheepli striggt fir d'Haidekinder,  
 Ob Aini «nundiedie» sait, ob «pfytschinder»,  
 Ob Aini Louis-Quinze-Bai het wie d'Dirge,  
 Ob Aini aim vor Liebi medt verwirgge,  
 Ob Aini ehnder kiehl vo Tämperemänt isch,  
 Ob Aini's Häsli vomene Dissidänt isch,  
 Ob Aini bydhet, goht in d'Synagoge,  
 Ob Aini gscheit isch oder vyl mues frooge ...  
 E Baslere kriegt halt noh der Fasnacht Durscht,  
 Und – isch derby! (... und's Ander isch ere wurscht!)

Was Baslerbluet isch, duet sich nit groß kimmere  
 Und überloßt d'Bedängge glatt de Dimmere –  
 Ob waißgottwo, ob in de Baslermuure:  
 An unserer Fasnacht, do will kains versuure!  
 Was isch en «Escalade», e Säxilytte,  
 Wenn's gilt, sy Basler-Stäggepfärdli z'rytte?  
 «Fasching» etcetera mag Eich d'Zytt vertrybe,

Doch D'FASNACHT ...  
 die ghert UNS – und wird is blybe!

Bolo.